

摘藻堂四庫全書薈要

集部

欽定四庫全書蒼蒼要卷一萬七千一百二十七

集部

滄溟集卷四

明 李攀龍 撰

五言古詩

建安體

三首

轉蓬遇回風千里一遨遊
良時不自愛汎汎亦何求
西來既迂怪周孔以墳丘
患無紛葩名年徃非所憂
烈士多壯心對酒苦難酬
枕石太華顛俯漱江海流

其二

北風正徘徊繁霜以霏霏經過至朔方惆悵我武威白
骨何籍籍鎧甲貫瘡痍猛獸蹲高岡狐兔失故蹊伐薪
缺斧折飲冰膠馬蹄遠行多苦寒中路渴與饑是時一
介志悠悠誰當知

其三

河漢懸清光三五正參差西北起浮雲霏霏風入帷白
髮一何早隱約當待誰快獨飲美酒登臺臨華池趙女
蕩奇舞秦箏繁且悲憂來亦有方安得常相隨

代建安從軍公燕詩

各九首

并引

魏三祖及子建諸子間各臨戎義有紀列久
當逸失不獨王仲宣五篇又公燕一章應阮
侵不就次與仲宣從軍詩過意諷婉均之未
盡所長今各代作二首云

代文帝

從軍

長驅下廣陵觀兵東南疆方舟被大海萬騎紛縱橫旌
旗隨波靡組練遠茫茫中流震金鼓士馬何激揚鎧甲

生悲風千里一鏘鏘白羽所漂搖浮雲自低昂撫劍登
高城我軍正相望零雨有遺篇咏言難可忘

代明帝 從軍

太常摩回飈旗幟何翩翩屯吹彌故壘列舟竟長川登
檣望四野蕭條無人煙高墉走狐兔荆棘動參天撫劍
下中流甲士羅東西賦詩寫其懷隨波以潺湲從軍在
萬里惆悵私其憐

代曹子建 從軍

丈夫志萬里慷慨事四方我后振威靈六軍乃激揚分
旗建東嶽耀武臨江湘鳴鏑控流飈利劍捷秋霜長驅
下淮泗人馬自生光戈矛何參差方舟正縱橫何言為
國讐一舉披舊疆解徒旆言入歌舞旋許昌離宮大饗
士勞賜以次行君子念在御賦詩垂華方

代王仲宣

從軍

方舟何翩翩素波亦蕭蕭葦葭澹餘映長檣激流颺撫
劍登高防人馬且逍遙空城何所有殺氣蔽旌旄日夕

見煙火四野飛蓬蒿邊聲起大江誰知我心勞從軍殊
復樂菲薄愧鉛刀

代陳孔璋

從軍

浮雲肅四野流飈殷悲音邊地一何苦慷慨難為心歎
馬長城下水寒窟且深白骨撐路出殺氣駕重陰將建
大舉功干戈日相尋騁哉書檄馳縱橫正如林身在記
室中憺憺匪自今男兒念鐘鼎誰能常滯淫

代徐偉長

從軍

自我出從軍涉旬東南行文學託後來顧瞻亦已深中
流萬艘集陶陶層波生淒風旗幟繁秋日戈甲精沈陰
結戰氣唯聞金鼓聲壯士何飛揚各願一先鳴志已馳
九關豈但懷不庭雖君在咫尺搔首未遑寧

代劉公幹

從軍

我后赫斯怒整駕東南征六軍如飛集列植龍陂城
皚霜風至肅肅戈甲鳴長飈轉沙礫仰視白日冥流波
一何勁金鼓悲且清連為下青雲毛血灑隰垆發機入

微妙觀者無不驚壯士以慷慨各奮先登情釋此薦嘉
客濡翰敘平生篇章信綺麗新詩雅以精小臣在緹幕
起坐懷同聲戎事諒非難但恐沈痼嬰

代應德璉

從軍

鬱鬱西北雲千里驅重陰臨江大耀士方舟載浮沈連
波響風雨長縹紛悲吟分曹命超距逸氣不可禁君子
在行伍常懷饑渴心非不愧細微良遇日以深故山何
時旋徘徊中自任

代阮元瑜從軍

高城苦多陰，秋日殊復悲。
邊聲薄暮起，但見浮雲飛。
霜氣勁且繁，河漢寒無暉。
三星何躑躅，皎月正徘徊。
流飈西北至，征馬鳴相依。
孤蓬帶驚沙，零落安所之。
自知從軍樂，誰能長不歸。

文帝

公燕

置酒高臺觀逍遙，芙蓉池兄弟夜行游。
貴客鬱參差，明月照長筵。
羅纓何霏霏，翩彼衆君子。
展詩奏新辭，絃歌

入微妙慷慨使心悲流塵蕩清響綺麗有餘姿吐握苦
不悉人生安可為在昔無樂方彼此同一時

明帝

公燕

三五明月滿四七靈宿繁清夜美行游置酒西苑園華
池濫輕波芙蓉一何鮮飛蓋拂流景隨風自潺湲主人
延貴客竟席列豪賢絃歌徹中堂羽爵騰我前徵音喟
有和甘醪發芳顏樂哉殊復樂君豈不俱然

子建

公燕

流飈起飛棟羣星集櫺軒月出芙蓉池清光滿西園侍
者夜行觴綺縞一何繁玉顏可攬持顧眄屬所歡華燈
正徘徊步障隨風還絃歌蕩層臺激響拂潺湲公子多
豪客從橫各成篇主人自和氏披褐將誰愆絕纓紛陸
離墜釵復闌干取樂比一時嘉會良獨難

仲宣

公燕

浮雲撤重陰流飈四座來西臨拓陽山南望銅雀臺回
首出中原曠然千里開公子大置酒絃管間行梧華燈

吐清光飛蓋自徘徊古人一含情于今安在哉亂離常
苦多歡極令我哀

孔璋

公燕

羈客心無娛間居日悠悠駕言侍高會公子招我遊凱
風飄拂鬱素暉蕩清流中庭煥綺樹芳蕤自沉浮登臺
遠顧望高下見原疇肅肅山谷悲黯黯陰氣收篇章時
間作羽觴不及投逍遙何以立功名為相求

偉長

公燕

高臺鬱嵯嵯其下臨清池黃鵠比翼遊淫魚戲漣漪微
風起水裔朱華紛陸離綺羅既生色笑歌不自治旨酒
但相屬羽觴隨波移人主寄一世歲月忽如馳豈忘誦
君恩賤軀未可知

公幹

公燕

月出西掖垣雙闕鬱蒼蒼白石爛素波蘋藻聚金塘方
舟轉清流飛蓋紛翔翔輕飈灑前庭明鐙暎中堂淥酒
溢尊罍嘉穀充圓方公子多妙製藻思何縱橫高談自

寵珍濡翰安能詳嬰疾日沈痼簿領非所長願言貽令
德儻俛不可忘

德璉

公燕

羣士諧佳會置酒君子堂清言解饑渴四座生芬芳雲
雨濯高翼沙石明夜光連篇命音響好合興文章三堂
開藝苑愛客擅詞場伸眉就存慰千載以為常

元瑜

公燕

知己難再遇攬衣及良辰天衢飛高翼清流濯纖鱗搖

落易為感孰能愛此身恩義不潛暢舉座皆異人公子
善養士中外常所親侍會此高堂羽觴何紛負翰墨風
雨集興文若浮雲翩翩致足樂願言守明貞

效應璩百一詩

殺函命關谷涇渭達黃河終南既而列沃野開其阿帝
王信佳麗天府鬱差峩銅雀鳴雲中員闕夾丹霞三秦
盛西氣小戎乃遺歌揚馬翼炎光流風激頽波使臣典
文字執憲臨羣邪春秋大校士與世陳四科祗役在末

位興言念皇家篚篚有璽書翩翩為國華

感懷 八首

寥寥高秋氣涼風激中庭明星一何的皓月復泠泠清
夜使心悲幽人起屏營羅帷徐動搖丹鐙發寒榮短歌
易慷慨伏枕通雞鳴伴侶稍稍單獨立非其情

其二

四海一流覽為樂遽何央經傳有依因大雅未淪亡知
名自前代騁翰各專場微音可通靈新辭協宮商綺麗

漫星陳江河鬱縱橫豈不多苦心世士竟茫茫中原二
三子春秋足翱翔離別致倉卒千載不相當

其三

明珠出大海豫章擢清雲宗臣開國功王佐難其羣公
朝日舉士愚者甘不聞披褐玩明時騁翰流華芬分適
中自諧知己俟其真磬折難為容彈冠各有人誰令君
獨往踟躕失要津

其四

明堂饗元祚稱歲朝京師侵晨宴鸞臺日夕宿蘭池
翩佳公子三五相追隨十千平樂酒羽爵何參差長歌
激清風顧眄生光輝秉我徑寸翰興文一如飛旁人徒
嗷嗷匹侶當自知離別難預圖樂往自成悲仰觀素雪
流俯見朱華披棄置安足陳亡沒無還期百年譬影響
倏忽誰能持

其五

在我遊帝京馮寵私自竒當年值數子無復新相知中

原一顧眄凌厲有餘姿用身常苦拙此志安得施浮沉
託大道四海一棲遲時俗溺鄙議長往不可追願言反
初服白日且逶迤酒中念故人千載為等期

其六

鴻鵠不嘯侶鷙鳥難為儔雙美無常玩江漢故分流
豎芳喻蘭石千載一綢繆佳言盈耳哉良時安可留在昔
誇中原數子從我遊

其七

孤行苦難立耿介傷其躬世路有姿態悠悠安所終美
服光照人言笑一何工抱鼓若籟磬折如轉蓬輕薄
不可視妖蠱誰能窮車馬從狹邪棘生九衢中

其八

浮雲翳高城回飈生戰場金鼓使人悲旗幟亦飛揚十
載一如此丘隴遞相望奈何轉蓬士翩翩常道傍

酬皇甫虞部

青陽一何麗冉冉西南馳言念庭中樹率已萎華滋昔

我同心友懽宴及良時携手理清曲各謂無人知天衢
多高足冠蓋自相隨所願不與俱朝親夕生疑含意戀
明世皓首為君期諒茲久識察紅顏坐盛衰

寄許殿卿

西山匿冬日北風悽以繁念茲歲方晏徘徊白雲垣俛
首事尺牘檐石聊自存悠悠塵中心夙昔非所論感彼
碩人情獨歌矢弗諼庶此涉時艱遂用安丘園路傍磬
折子高足策華軒吐喑金蘭客來當蹈斯言

賦得何仲默

仲默自天秀弱齡負遐矚十六遊京邑藝苑策高足揮
毫坐華觀懷人理清曲歸來放情志日晏從所欲結好
玩遺芳明德以相勗古道諒寡諧遂令傷局促

五子詩

五首

王元美

元美何翩翩夙昔秉靈異京洛多冠蓋操觚各自媚所
遇無此物識曲聽其偽大雅久沈邈時清作者至俛仰

知音稀含茲未伸意但坐奮逸響側身向天地虛名喜
誤人依依千載事浮雲相攬持白日一高視四顧命儔
匹中懷誰可致凌厲子長氣文章此未墜

吳明卿

吳生蕩滌士明德復何早高舉凌風翮青雲漫漫浩浩良
士冠帶會斗酒弄辭藻一彈中清商下里難為好知音
率已稀隱几存吾道衆言紛盈庭膠漆各自保掩耳走
滑亂褰裳度潢潦罵坐豈盡狂流俗令人老陸沈金馬

門懷袖諫書草白日有棄捐遊子悲不造

宗子相

婉婉維揚士早歲絕人識結撰有至思先民乃遺則時
俗徒嗷嗷此物知者得鬱鬱獨徃心百折江河力披覩
他自媚我意安所測念茲携手驩榮名與令德浩蕩陰
陽移吾道相終極語及千載事愀愀動顏色中懷誰可
喻文章亦經國一為麟鳳言三歎加餐食

徐子與

徐生一何俊本自青雲姿十年住天目含意多素辭既
聞風雅音三歎文在茲眇昧生榮名徙倚即前綏念為
理清曲高言倡者誰躑躅流俗間携手不相疑時髦滿
要路各謂中心私世人豈同顧吾道欲委蛇黃金買大
藥朱顏庶可持物理率如此和光難獨窺

梁公實

梁生起南海負氣何個儻北交中原士徘徊得吾黨高
名豈宿著一朝奮鴻響時俗既淆濁振衣念獨往禮法

難為工局促向天壤王喬可等期服食理非枉引領還
羅浮願言稅塵鞅俯視大河流逶迤浮雲上盛衰隨物
化世情自鹵莽吾意當告誰黃金妬偃仰

二子詩

二首

盧次梗

盧枻起河朔本自千金子蕩滌諸生間銷骨於積毀世
無臨邛令焉得心尚爾深文類繆恭罪罟中狙喜乃繫
黎陽獄十年攻一技既出浮丘賦始知有株累三嘆不

同時帝曰付諸理寥寥相如後誰能識察此

謝茂秦

謝榛吾黨彥軼軻京華陌黃金自不留朱顏亦已擲韋
布豈盡愚吐嗟名士籍握手金閨人中情多所適冠蓋
羅長衢染翰日相索遂令清廟音乃在褐衣客一出遊
燕篇流俗忽復易還顧望鹿門矯矯青雲翮

酬元美

二首

妾本秦宮女少小揚蛾眉早辱君王寵朱顏驕自持卷

衣皆羅紈明珠縱橫垂頭上翠琅玕爵釵珊瑚枝盛年
處深殿容華天下知一朝在里巷遂為生別離此身託
古歡南山猶可移東鄰蕩子婦泥沙委路岐中心指秋
日同穴乃所期

其二

有鳥名黃鵠乃在琪樹柯下來太液飲啜噪荇與荷周
游視中土少年多羅家金衣菊為裳不受矰繳加一舉
絕四海離哉天可摩毛羽未摧頽鼎俎奈爾何

再答元美 二首

盈盈倚蘭花深谷何逶迤秋風凋奇樹隕擇以歲蕤含
英即蔓草不復揚華滋豈無王者香結根非其宜孤生
感霜雪采折中心知幸君置懷袖慰此長相思亭亭西
山栢自茂凌寒姿下流難久居壯士多所悲

其二

采苓首陽巔青蠅止于棘結髮奉歡宴栢舟矢靡慝上
堂理琴瑟下堂視蠶織昵若形與影在遠復相憶豈不

防未然萋菲成固極愛深生百憂棄捐衢路側賤妾抱
區區中道蒙察識琴瑟聽其真蠶織五文色非君膠漆
心羣小志亦得

郡齋同元美賦

遊子苦行役驅車自溟渤依依平生親斗酒日云沒秋
風亦已厲蕭條衆芳歇何以贈君子徒倚攬明月燕婉
當及時霜雪變華髮高足蔽天衢浮雲望雙闕令德一
見疑積毀能銷骨中懷不復喻邈若胡與越綢繆有故

人知音無倉卒常恐遠別離含意向明發

送元美

二首

有鳳銜靈文栖栖北海湄臨流理毛羽五采以自奇飛
如摘羣星擊若朝霞披翱翔千仞岡亦集梧桐枝一鳴
叶清廟再鳴中咸池淒風振大野青雲顧我悲世無伶
倫耳誰為度參差回首顧丹穴摧藏不可持將止帝東
園恐令鷓鴣知阿閣在萬里哀號乃見疑啁啾榆枋間
燕雀相追隨清光蔽白日何當復來儀

其二

夙昔二三子，慷慨揚奇聲。文章凌先秦，詞賦無西京。零
落如流星，各懷饑渴情。念爾策高足，北海日以清。顧眄
當中原，冠蓋徒縱橫。明發詠蓼莪，依依戀所生。悲風薊
門來，涕泣霑我纓。解帶謝時人，驅車薄姑城。千里見大
河，躑躅浮雲征。罷酒不能別，蕭蕭駟馬鳴。骨肉非一身，
意氣乃合并。景光老自愛，率已識榮名。

答寄俞仲蔚

二首

太乙貺漢德名駒生渥洼赤汗霄青雲長嘶振流沙饑
齧玉山芻渴則飲其涯翹尾以躑躅駒駘相經過不願
游閭闔况乃服鹽車世豈無伯樂垂耳奈我何天子發
素書使者出蹉跎駢駢十二閑駑馬常苦多雖有千里
姿羈絆非所加

其二

鬱鬱龍門山下臨千仞谿孤桐生其間幹與浮雲齊湍
水擊其隈迴波蕩其涯野火燔其東飛雪塗其西莫則

止黃鵠朝則啼鷓雞悲風從天來清商以淒淒伯牙不
能去傾耳中自諧匠石空扼腕運斤路何階琴瑟和神
人無乃非其懷結根既已異雨露難獨平願言俯大壑
往就長離棲

送李明府入奏

西北夏雲別飛蓋亦相望供帳被城隅父老皆扶將天
子秉百度作新大明堂椽桷曼且碩掄才自南鄉山河
俯壯麗肅穆垂衣裳是時薰風至五月開未央既奏解

愠曲或和斯干章聖顏慰饑渴帝心簡四方冢宰上績
書召見伏明光用等課高第視事稱維良小臣奉威靈
不得施其長誰謂一邑輕治行乃無疆願言備侍從珥
筆述陶唐策勲諒有期遺愛匪可忘

許殿卿郭子坤見枉林園

二首

明時再嬰疾隳官此悠悠永言命沮溺二子乃從游田
家何所有樽酒結綢繆散髮坐園中輓轡牽寒流擊我
青門瓜聊且充庶羞雨氣蕩喧濁披襟御南樓開軒納

山色餘映一以收雲霞羅四隅烟火蔽林丘伏陰秀禾
黍餉婦媚原疇西望華陽宮若見清河舟登臨信亦美
曠然銷人愁願君愛景光多暇還相求

其二

佳客即良夜此會安可期結髮為兄弟晤言今在茲層
臺挺浮雲河漢宛其垂積陰濯列宿三五正參差前山
殿影亂雨勢坐已移皎月出平陵徘徊當照誰清光澄
暑氣颯若撤長帷潦水明樹間流飈澹華掬零露響空

林蟪蛄以鳴悲世路良獨難斗酒多所宜達人忌榮名
千載同一時

杪秋同右史南山眺望

南山有幽意駕言此徘徊湖波蕩寒城四座清光開金
天澄素景秋氣何悲哉繁陰遞白日浮雲間往來落木
颯中林流飈激巖隈朝昏上烟火原隰被樓臺故鄉無
滯淫世路多塵埃念我平生歡離思壯難裁

九日集殿卿池亭分賦

二首

卜幽命詞客冠蓋至如縻白雲澹蕭晨黃花媚新醞灑
翰湖山清開樽魚鳥近零露偃池荷淒風携籬槿徑回
片橋出林暝寒城隱臨流濯長纓飄然祛塵至

其二

寒空鵲嶺秀霽野湖水濶墟落散城隅池亭入幽豁雲
陰出水鮮石色含霜活白鳥下烟際歸鴻起天末返照
欸長林羣流亂相聒紫蟹壯可持濁醪美堪掇秋高吹
臺興老劇文園渴佳節有獨醒吾生豈云達

集張使君別業

清河迅寒流金輿杳空翠秋氣下高原蒼然西北至
返照散疎林蕭條烟景異零落復佳期茅茨况幽致握手
平生人笑談出往事舊游數子盡風流吾黨備千金抵
白髮一醉滿君意

秋夜白雪樓同許右史襲茂才分韻

二首

林烟既曳綃湖霞亦披絳雞犬靜荒村蓬蒿翳深巷
燒微見月出鐘清識霜降各稱浮白樂未覺呼盧慙更賦

梁園雪如流華渚虹預愁還城邑車馬紛相撞

其二

返照入平陵白雲出西隴天清鴈影澹山空嵐氣重三
徑何蕭條高人乃接踵諸生稷下秀詞客梁園寵松菊
有佳色琴樽亦慙憊但醉不須眠寒燈坐相擁

送許史得弟字

秋風一蕭條白雲自相綴翩翩爾曳裾慘慘吾分袂鼓
楫大河流揚帆下衡衛平臺壯登眺鄒枚儼兄弟既出

兔園篇頗魚子虛製詞賦有知遇王門即恩惠

集開元寺

流陰拂層岑返照翳深谷古寺入蕭條迴巖抱幽獨梵
影淨香臺鐘聲殷石屋絕壁棲禪誦懸厓下樵牧秋花
雨還瘦老樹霜逾禿寒泉可瑩心白雲况極目登臨客
自佳搖落時何速疏色蕩腥蘊苔光清簡牘新詩發神
秀舊游耿初服歸來杖屨便老去烟霞伏高城出岬睨
燈火通林麓言旋轉多興後期此同宿

答張秀才問疾

青陽蕩積晦素雪亦云熙
仲月陶嘉樹閨庭暖流滋
微風中夜興清光動遙帷
殘燈出四壁鐘鼓一何癡
閉關抵百役內熱耿于罹
養痾終年歲人生能幾時
服散代晨餐已箸厭相持
哲夫秉大觀一往不復疑
所愧乏明德盈縮無常期

寄題離資園

二首

芙蓉媚昭質初服一何好
繁霜日夜零悲風起中道
鶻

鳩既已鳴所遇無芳草馳驚終年歲紅顏足用老美人
怨遲暮回車自不早蕪穢昧榮名同心以相保

其二

蘭生有幽性零露峻其姿含芳在空谷清風來御之孤
根亦何傷衆草故難為萎絕同糞壤中情君豈知願言
置懷袖延佇及良時荃茅一以化奈此萊與施

贈元美兄弟

唯帝饗金石拊髀封疆臣二子越枕戈避讐棲海濱及

時列寃狀含意遂俱申乃望漁陽戍北風飄沙塵若見
姑蔑旗陰雨施威神吳門有丘隴舊與要離鄰陳尸赫
中寢國命委荆榛楚王黜費氏棠君紀人倫何如上公
服寵光燄所親頭無廢前勞報恩致其身

虎跑寺泉

大士始結構鑿空偏此丘二虎自南嶽掉尾從師遊神
威攖地脉佛力驅陽侯枯火迸石罅松根解綢繆勢寧
決蹠去揮錫怒不休至今噴巖壑水猶咆哮流酌言生

壯心一嘯風颼颼海眼在其下潮汐故可求不然胡僧
呪爭使波瀾浮穿壁吐長澗夾寺澗龍湫疑作故山雨
片雲駐岫嶺歸應出東林無為惠遠留

求志園

吳門有奇士二弟偕好修鞍馬照紅顏往來長者游帶
劍何良綺垂纓亦綢繆豈不攬豪賢我志非所求駕言
旋北郭灌園依一丘白雲蕩虛壑餘映翻寒流置酒臨
高臺邈焉懷其儔鴻鵠既云舉千里常悠悠清風動帷

幕皎月光沉浮讀書見古人鳴琴調逾幽無取廣川觀
昔在漢陰叟天子御飛軒龍蠖時乃瘳回首望中原壯
心未可收

子與至武林

良時能自至嘉會無常期長飈吹浮雲奄忽東南馳依
依曳景光泠泠發餘悲非君命儔匹游子安可為大江
折其流武林愴以摧念今在往路執手野徘徊何必同
一身中懷貴不疑彈冠有逸響駕言即前綏

古意寄德甫

三首

悠悠我行役，往路殊未央。
春華不須臾，奄忽踐嚴霜。
安知疑與喻，風波起褰裳。
浮雲邈無所，游子依故鄉。
長當遠離別，何必復彷徨。
鴛鴦自知踟，黃鵠已翱翔。

其二

嘉會在俛仰，良時不可留。
悲風自遠至，大江以悠悠。
中懷有白璧，千載為一投。
飛龍雙欲乖，胡馬羣相求。
徘徊視四海，含意各未酬。
念此平生親，從彼浮雲游。

其三

明月照我牀清風感重闈遺書發懷袖彷彿見容輝古
歡匪自今游子當何依千秋一高唱豈獨知音稀莫言
苦行役極宴不如歸努力兩黃鸝為爾故鄉飛

贈德甫

豫章生庭中結根西山隈江流一蕩滂悲風千里來絲
蘿謝依託冰雪抱崔嵬非不曼且碩時無栢梁災截為
玉女瑟絕勝龍門材展我清商曲彈作臨高臺洪厓頷

願坐五鳳鬱徘徊

灌甫東坡宴

王孫古城隅東坡託偃仰回薄始翁雜高臺忽峻敞風
波一以交淪漪恣遐放列雉翳中流返照幕魚網曲磴
盤層陰清房殷清響並逸金谷韻魚詣濮陽賞恢台戒
隆曦披髮命吾黨美酒滌煩囂冷言發神爽至今河朔
人垂聲得個儻直置病游梁為心任獨往

滄溟集卷四



總校官庶吉士臣侍朝

校對官檢討臣王鍾健

謄錄監生臣沈心醇

欽定四庫全書薈要

集部

滄溟集卷五

六

詳校官候補通政司經歷臣郭祚熾



欽定四庫全書薈要卷一萬七千一百二十八

非部

滄溟集卷五

明 李攀龍 撰

七言古詩

送靳潁州子魯

 華陽館前桑葉飛荆軻臺上送將歸為言擊筑悲歌者

當時酒人今是非太守寒帷薊北來燕山忽斷楚天開
郡中曉月雩婁出霧裡秋濤桐栢迴黃金璽書發明光
東走潁州西豫章君家兄弟二千石承恩不數尚書郎

朱轡雙出領專城五馬踟躕五馬行漢主乘春徵計吏
小馮何讓大馮名

送新喻李明府伯承

爾昔紅顏客薊門獻書不報哀王孫一朝致身青雲裡
座上還開北海樽余亦題詩郭隗臺燕山秋色對銜杯
論交共惜黃金盡此處空悲駿馬來可憐郢曲今亡久
下里之歌吾何有文章稍近五千言雅頌以還十九首
才子新傳白雪篇江城忽借使君賢那堪西署為郎者

多病離居臥日邊

贈張子含茂才

憶昔中丞全盛時少年裘馬相追隨
忽逢世變夙心違
逆旅荒涼舊識稀
古來萬事皆如此
何用空悲昨是非
流水無情白日速
紅顏猶在黃金微
飲君莫辭燕市酒
欲行不行更攜手
青雲今有故人存
好贈緜袍哀王孫

刁斗篇

陰山戰合胡天黑
漢兵大呼單于北
邊秋日落五原
屯

磧火夜連千竈食驃騎橫戈拂鐵衣悲風黃草白榆飛
渡河烏陣旌旗伏臥壁龍沙鼓角希征人馬上援枯骨
滿地清霜刁斗發朔氣遙傳瀚海雲寒聲亂動輪臺月
掩笳驕虜聽垂泣按劔材官怒指髮宮女琵琶咽逝波
使臣旄節彫幽窟誰能絕漠掃妖氛哀響如今不可聞
六郡少年思轉鬪擬金猶憶李將軍

送張子參募兵真定諸郡

薊門昔在胡塵中匈奴火照西山紅
檀廬相望赤縣隘

腥羶未厭神畿空君王拊髀過郎署侍臣扼腕談邊功
每飯不忘鉅鹿戰千金先發華陽宮邯鄲少年游俠子
腰間匕首懸秋水出身願屬羽林兒橫行誓奪單于壘
騰裝夜別縱博場貫酒朝辭挾瑟伎馬上風雲八陣成
帳前鼓角三軍起故人新貴寵軒墀亂後高名衆始知
國士漸看投筆至主恩况許請纓為天寒恒嶽倚長劍
雪滿滹沱擁大旗歸來漢苑生春草見爾論兵散幕遲

齊俠行

簡書八道發明光詔徙羣豪赴朔方神武臨軒耽虎視
將軍秉鉞鬱鷹揚山東十二諸侯國海濱五百義士鄉
厭亂齊臣思定伯殷憂漢使出勤王敵驕擬縱田單火
客憤能飛騶衍霜毅騎人人白羽箭民兵處處綠沈槍
九河寒色旌旗動岱嶽秋陰鼓角長各倚少年輕燕頤
曾經遣戍守漁陽被髮左衽豈受賜排難解紛不可當
往歲潢池先陷陣三時大戰銀冶場功名未致有莊賈
肝膽欲傾無孟嘗天子只今顧西北男兒俠骨埋邊疆

賦得金谷園障子

誰將金谷傳毫素座上無人不回顧乍展旋驚澗水流
纔開已識河陽路四壁真看片錦圍中庭如見雙鬢度
移席休臨墜妓樓解衣欲掛沙棠樹彷彿明妃出塞吟
聽來未必梁塵誤詩成酌我我豈辭便過三斗無論數
綠珠安在恰當壚似留且往勢可呼意慘崑崙紫窳蓀
色寒滄海紅珊瑚君家富貴合如此此時那知有障子
縱然客散掩空堂猶聞夜夜春風起

送申職方謫萊州推官

嫖姚三疏奏明光
九月王師掃大荒
不求十萬羽林騎
從軍但請尚書郎
看君未是侯門客
草檄論兵一當百
片言不合徑拂衣
坐使元戎氣蕭索
漢主臨軒送逐臣
褰帷海上及行春
正逢匹婦銜冤雨
一灑浮塵不污人
遊燕曾携短匕首
袖裏虹蜺今在否
出關若見棄繻生
為余持贈單于走

送趙員外行邊

狐白之裘紫駟馬鳴邊東走漁陽野自言天子授長纓
明光殿前三使者飛檄遠度桃花山昨日遼西校戰還
吹律春風回黍谷揚旌暮雪灑榆關關門一望烟塵色
抵掌志馳伊吾北豈獨秦人重繞朝誓令羌虜避充國
此行不按督亢圖欲畫地形取匈奴指揮千障鐵如意
出入雙鞬金僕姑驃騎將軍綠沈甲鷓鴣大夫黃石法
磧裏兵屯種玉田雲邊燧起彈琴峽元戎幕府贈吳鉤
太守離歌岐麥秋看君歸奏稱上意何足道哉萬戶侯

賦得狼居胥山送李侍御

材官十萬絕大幕踰河一戰胡兒却夜縱翼兵龍章渠
繫以往封狼居胥姑衍山頭列旗鼓中壇擁燹陳首虜
帳前面縛三當戶驃騎將軍醉歌舞北風千里雲摧頽
瀚海波濤蹴日迴漢家天子雄才哉捷書親發栢梁臺
君持繡斧五原郡牧馬單于不敢問黃沙白草寒冥冥
今年為王犁二庭

送徐汝思郎中入蜀

岷江東流何渺茫仙舟西去指華陽峽深當晝暗雷雨
白帝青天豁大荒一望峨眉山上月風吹寒影墮瀟湘
益州部裏占星使草色春時接夜郎客將河漢支機石
歸自乘槎歷七襄長弘碧血埋難化杜宇啼魂怨未忘
胡不為我排閭闔願君致之北斗傍即今叱馭九折坂
金精元氣參翱翔雪峰突兀三飛梁中掛鳥道通蠻方
司馬長卿子虛賦其文可以陵青蒼臨邛小監楊得意
亟薦詞臣謁建章後來此事益寂寞烟塵萬里遙相望

葉舍人

舍人家世稱儒素供奉班聯起居注仙郎盡識鳳凰毛
父老相傳驄馬步當日蘭臺抗疏還讀書高臥柳亭山
至今猶憶張文紀年少官微犯帝顏聞君夜入蓬萊直
歸夢時時動秋色翰染金莖彩露寒廬開玉樹青天逼
回首南雲春事繁浮丘峰下小桃源他時揺艇新安水
坐把江花醉故園

送謝茂秦

孝宗以來多大雅布衣往往稱作者謝家玉樹操郢音
其曲彌高和彌寡寓梁曾曳王門裾遊燕欲薦中涓馬
豈無冠蓋映當時滿眼悠悠世上兒文章千載一知己
交結何須鍾子期此物有神兼有分富貴浮雲不與之
盧耒坐銜越石恩醉後感激肝膽言蒼鷹睚眦鸚鵡賦
身挂羅網何由醜殷憂楚奏秦庭哭遂雪黎陽國士冤
歸去東將釣滄海安能貧賤常丘樊早借江鴻報消息
或臥春雲且故園

送太醫令周一之從大將軍出塞

武皇按劍明光宮
夜發材官六郡雄
臨軒親遣上將軍
誓掃匈奴成大功
白羽九邊傳漢月
霜戈千里排胡空
轅門豈聞天子詔
帷幄寧多策士風
書記翩翩爾其選
志勒燕然禪姑衍
業許原嘗念已深
情憂平勃交仍淺
藥囊每擬提荆軻
驄馬何曾避桓典
淮陰惡少舊相輕
朔方健兒知姓名
身為揖客元戎府
意氣秋高出塞行
二百年來無一載
今日王師遂北征
便當滅虜始朝食

不繫單于不解兵

南溪老樹行

老樹橫溪十畝陰下有跳浪三百頃酒罷捫蘿坐其上
白眼青天何不逞牛斗之間見浮槎蒼茫宇宙成漂梗
念我平生湖海客衣裳泠泠風馭冷文章八代俱望洋
心事幾人同哀郢醉裡誰堪此陸沉俠來氣與千濤猛
洛浦明珠舊寂寥渥洼神駿空馳騁鬪然大叫觀者摧
那知世路滄洲永投足還探河伯宮俯身欲拾中流影

驪龍蜿蜒垂霧雨虹霓繚繞舍光景須臾力疲神亦眩
乾坤低昂發深省最奇披髮涸呂梁願言洗耳臨箕穎
初看長駕出鼃鼃豈云吾道終蛙黽王郎驅石到渤澥
徐子招招迴舴舺此時共濟失狂瀾却悲昏溺情難整
泥塗詎可困豪俊男兒相逢誇項領遂憶鳴鞭作夜歸
湘娥漢女猶延頸羣靈至今未敢散寒江颯颯開塵境

送公實還南海

梁生偃蹇誰與倫梁生偃蹇無與倫為郎十月不厭意

上書乞歸南海濱文章往往近時好富貴安得嬰其身
獨存肝膽論交者一一凌雲作賦人憶昨擊筑飲燕市
酒酣以往氣益振黃金之臺空嶙峋華陽之館誰為新
駒駖駮耳俱良馬劍客博徒皆俊民梁生徐生情最親
宗生王生詩更新經過但坐歌白雲罷曲彷徨若有神
揮毫夜夜搖星辰襟期矯矯何能馴梁生此事成萬古
欲別牽裳遂具陳羅浮之山何崔嵬下臨莽蒼波濤開
維舟跋浪長鯨出倚杖垂天大鳥來北望中原寥廓哉

飛厓坐攬百粵色羣峰黝渺行風雷梁生之廬構烟霧
千尋薜荔青摧顏有時高咏反招隱巖壑無人秋雨哀
尉佗椎結本趙俠陸賈縱橫一漢才丈夫有道在龍蟄
還能與世相襄徊梁生何為終蒿萊梁生慎勿終蒿萊

擊鹿行

并引

余往與王生過子與見伏鹿於庭戲相謂曰
余將携徐夫人七首刺此鹿麋腊之也生豈
不願為我掎角之哉又與王生過子與則子

與刺殺此鹿食王生既而宗生亦至相與批
脯飲也亦大豪舉哉乃各賦擊鹿行壯之矣
徐卿意氣殊不偶買鹿百金求其牡華堂燕客忽自放
醉把邯鄲鐵匕首須擬麟從帝數游未聞鹿觸匈奴走
高材吾黨復誰過文章矯矯驅羣醜失日難將四海求
逐來定死諸公手毛灑旋疑霜雪寒角摧更見珊瑚朽
王郎大叫奉銅盤接飲其血軟以酒顧我前呼歷下生
與君相愛為君壽舊時疾足今能否安得新詩滿人口

須臾碧眼胡兒至落碁脯腊無不有下箸已畏翠釜空
纖羹更出青閨婦象看杓上肉如陵覆蕉尚在隍中守
嗟乎曲士夢何久徐卿獨醒可與友

送元美

王生二十趨明光是時作者不可當世上之名他自誤
須君千載垂文章夙昔陸沉秋憲府風塵慘淡尚書郎
心知此物難再遇片語論交燕市傍携手七陵朔漢色
悲風九月吹白楊居然宇宙見雄俊睥睨今古神飛揚

流俗紛紛失肝膽那能結客聲利場近日操觚滿京洛
江河決注非其長家握靈珠戶和壁及逢周客皆深藏
高才瘦楠與杞梓吾道麒麟或鳳凰清廟遺音壯昭代
天庭火藻懸衣裳生也經綸斯濫觴混塵安取金躍冶
養銳更羞錐處囊伊周屈宋儻易地鈞衡蕙苑俱稱良
生也為情誠彷徨但願右挹擊筑之荆卿左拍接輿之
楚狂二豪侍側乃螺贏四子講德如蜩蟬舉觴白眼天
茫茫秋風胡為歸故鄉亦欲送生從此去留生不住悲

河梁彩虹千尺挂
碣石贈生千里為帆檣

楊山人

四首

茗溪之水何泠泠
吳山一峰天目青
千林萬壑子雲亭
從他世人還解事
白頭不厭太玄經

其二

吳門市卒能逃名
長安貴人非其情
南山薄田春自耕
盛世為農亦足老
少年何用隨諸生

其三

千筐湖綿白雪開滿江稻色黃雲來山中客醉頷其頰
自言七十巖耕者帝於我有何力哉

其四

長裾不為王門賓千金散盡江湖人菰城一臥三十春
看爾紅顏逐燕雀終然白髮行風塵

送子相

自作白雲郎未厭滄洲意偶然薄祿混風塵論交千里
賢豪至元美翩翩多奇氣南越梁生亦確視二子招携

從此逝爾今臥病緣何事綠鬢還鄉已壯遊錦帆十月
下揚州移家好住昭明樓種瓜莫羨東陵侯文章萬古
垂大業富貴浮雲非所求知君林壑百不憂圖書四壁
高枕秋世人那識淮海士須行便為名山留丈夫義豈
辱顏色使我摧眉去即休安能訾呪向權勢咄嗟空令
達者羞夙昔竟寥闊後來復泱莽相看一別雨墜天他
時神劍來猜爽既言郊藪走麟鳳朝廷寧得無吾黨卿
也抽簪且偃仰漁陽日影黯如黛薊門雪花大於掌馬

上燕歌變徵聲壺中酒盡君當往

俠客行為子與贈吳生

本自吳越冶遊郎結交燕薊少年場長裾不曳朱門裡
擣菹大叫青樓旁被酒目憚羽林騎擁金作使邯鄲倡
弟畜灌夫師事田光得意一言失意一言相怨一方相
慕一方男兒過逢好驚座世事握齧寧陸梁姓名何惜
借輕薄出處未須論侯王親知猶向隅有錢徒克囊譬
家猶戴天有客徒滿堂猛虎可值俗子莫當平生片心

照秋水明日報恩還故鄉

留別子與

從君幾醉燕京酒舊遊花月回白首相看零落眼中人
二子河梁重携手憶昨青山坐西署于今此事成不朽
交態蕭條爾自諳浮名慘淡吾何有爭道賢豪擁上林
華陽臺館盡黃金長卿詞賦徒壁立曼倩佯狂合陸沉
平生得意向知己常將顏色當丹心北望諸陵一拊髀
悲風千里來寒陰春草如雲覆四野我行逶遲五具馬

十載為郎頤已違出門况復悠悠者漢臣猶未老馮唐
每飯豈忘鉅鹿下歲晚江湖夢獨遙秋深鴻鴈書堪把
題申職方五嶽圖

誰將五拳石錯落余之堂坐看素壁纏雲霧安得羣峰
掛屋梁更愁深林暝難入嵐影明滅侵衣裳左眄欲生
滄海日右臨少昊凝清霜掃練白沙走朔漠回毫紫蓋
垂炎荒須臾二室峻增出杳然置我烟霞傍不聞吹笙
控飛鶴浮丘子晉俱冥茫良工拓筆天為開長風西逐

層陰米中庭無人數移席巔厓乍墮松杉摧眼前突兀
太古色九州慘淡如浮埃空穢神農未誕降元氣始判
洪濛哉大江浩浩黃河流巨野相望懸莫秋異代猶探
秦漢策真形或結金銀樓憑軒忽驚去千里青鞵竹杖
胡在此復疑窈窕迷歸路何當稅駕聊徙倚捲簾逾添
空翠寒張鐙更愛夕陽紫邗襄小吏困時名知君雅意
憐泥滓

送永寧許使君

二首

邢州十月凋白楊城頭出雲垂太行把酒相看日欲墮
五馬踟躕大道傍問君胡為萬里去小臣罪合投窮荒
我聞西南羅施國風氣鬱塞殊陰陽長官椎髻見朝吏
海蠻醉鼓橐中裝男兒貴至二千石何地不可稱龔黃
壯遊須令百粵盡探奇更得浮沅湘永寧自惡無瘴癘
明年雨露生還鄉

其二

使君落魄高陽徒結交李生仍狂夫醉後裂眚一相視

怒髮上指浮雲徂白日並堪出肝膽黃金誰為收泥塗
長安少年太巧宦依倚權門何事無失策始就公府辟
得意豈領蠻夷符爾今折腰揖下吏我更掩泣臨窮途
奇數能令遇合變美才常被功名愚武溪毒淫須自愛
九重沈深不可呼憶昔終軍繫南越鄉里小兒何其虎
荒服盡霑大漢德單車入郡歌來蘇固知永寧之州纔
如斗天子求賢三輔圖儻有徵書到遷客五馬好過秦

羅敷

送王給事使潞

憶昔胡塵暗薊門六軍如雲集闕下天子授鉞臨軒檻
宜陽王公其人者風流舊出城朔方簡在新除大司馬
是時將帥實跋扈傾耳履聲入北斗引經答詔動稱意
草檄提兵常在手帝力自堪制閭外股肱佐命吾何有
一從誅亂朝廷清四海亦重尚書名看君少年青瑣客
漢家今得韋玄成袖裏彈章百不避囊中諫疏垂欲行
主恩三晉持節使上黨諸侯帶礪功泛槎春度濁漳水

設醴夜宴虎祁宮歸米煉石補造化論思庭諍才何雄
郡齋同元美賦

夙昔紅顏一大夫乘軺河朔何為乎除書歲下不得調
鼓其刀筆寧壯圖帝恩初欲存折檻謂爾祝網從皇都
相逢但飲邢州酒太守况即高陽徒庭前秋色正慘淡
囊裡新詩復有無醉歌出塞雲中曲朔氣颯沓來飛狐
路傍小臣久泊沒安得座上開江湖眼前大雅竟誰是
作者如山道各殊更須一日論萬古揮毫振臂羣雄呼

維時海內稱二子高名自喜王生俱白雪青天動蕭瑟
臺郎郡吏同崎嶇楚璧照鄰不敢獻蛾眉在宮還自塗
王生仰視浮雲徂矯手將我領下鬚與君周旋在今日
還能百萬來長驅忽然神氣回莽蒼孤城搖落相踟躕

跳梁行寄慰明卿

武昌季子吳國倫左遷三載匡廬春紅顏便看青雲色
白眼豈是功名人邢州太守昔入計猶自金閨侍從臣
顧問片言搖日月彈章一字動星辰雖然舊屬平津吏

常苦跳梁不可致，調笑縱橫倒四筵。交驩往往非其意，
世間那得郢中歌。君但論詩吾且睡，何須更比謝生肩。
但應獨把王郎臂，蕭條頗似東方生。南康郡裡憶承明，
文彩縱然傾漢主。詎諧難以取公卿，畫眉石鏡二女保。
濯足長江九派清，此兒尋常未易識。偷桃賣藥行妖精，
近來猶尚憑陵否。俯仰浮沉無不有，朝讀司空城旦書。
夜沽茂宰柴桑酒，成敗寧關達士心。卷舒終在朝廷手，
隨他肉食作雄飛。饒我褐衣稱下走，黨禁重開祝網年。

一時逐客寵光偏晚收已抱泥塗恨更謫如何不可憐
事急誰能馳叩闕家貧未擬罷歸田再來地僻逾高枕
就使荒涼給俸錢壯遊萬里君須見青瑣鳳池元不賤
使氣能令魑魅藏出身曾厭撓槍變楚狂豈止接輿賢
秦孽猶堪背城戰回首畏途真自知一官不絕纔如綫
難將此物鬪翱翔妬口含沙未可當四海弟兄堪並起
中原我輩正相望總看棄置風塵裡不作踟蹰道路傍
鼓枻更逢漁父笑豈應憔悴老滄浪

此兒行重寄明卿

我聞南康大如斗明卿佐理常什九昨日中丞抗疏薦
賢聲輒滿朝廷口豫章計吏入圖事愛君未敢援以手
小臣憐才上白狀相公良久疾其首量移亦已從浩蕩
不然徑逐此兒走誰知片言觸忌諱畢竟功名成掣肘
丈夫失意分自當窮來傍人人避藏苦我折腰骨太勁
看他伏謁頃能強縱令慢世無不可似爾干時豈所長
莫作拂衣少年態官遊須使及陽春大舒楚歌小舒舞

是處江山好斷腸王郎至今棲北海帳前萬騎綠沈槍
拂衣行答元美

五原驅車興殊淺三秦臥病秋雲高束帶那能見長吏
談經何以隨兒曹上書一日報明主願乞骸骨歸蓬蒿
小臣采薪業不佞聞道策由亦已逃拂衣中原風雨來
羣公祖帳青門開二疏一去三千載大夫未老寧賢哉
新鄉城西重回首當時叱馭其人走路傍伏謁莫敢動
囊裡俸錢君但取此輩交情雖可見吾徒大名終在口

于今偃息南山陲閉戶不令二仲知負海少年大跋扈
遣使問我抽簪期百爾不分一狂客余髮種種何能為
玄經半卷常自誦濁酒千鍾醉不疑五子江湖正漂泊
黃鵠摩天慕者誰

答許右史

二首

黃鬚兀兀田舍翁傾身坐向錢孔中長頰便便美少年
行步顧影私自憐誰知腐鼠能為祟縱是神仙有插邊
使君似識浮雲意蹉跎實為功名利己拚酒隱富貴世

潦倒佯狂百無忌濁醪恰供十日飲酣法須與當時異
五斗乍可調燥吻飛觴二子雄相視醉殺不作傲杯人
邇來那得獨醒事魏文大白滿如月曾託屬車稱國器
若言此物非其任爾家破瓢亦應棄

其二

王門隱者身坎珂老曳長裾裾婀娜自言能料一生事
及至干時計常左從它慘淡復為誰即得新詩題向我
雨雪蓬蒿共三逕春色傳伶餘藥裹濁醪但熟貧亦足

微官纔罷病輒妥胸中壘塊故須澆乘興往往無不可
白眼生成薄祿相青山合就漁樵夥趙壹疾邪衆所擯
鄒陽暗投才應坐羨爾悠悠世上情回頭數子殊么麼
送萊蕪蕭簿

蕭生業本儒術起稍因讀法得其指栖息十年白鹿洞
擔囊一卷青烏子岱宗雄蟠大海濱衣冠氣王中有人
我家松檟三千樹鞍山東望華不注為說干時常轆軻
獨憐明主能知遇萊蕪作簿更誰羣但恨無過范史雲

釜裡蠹魚堪自見鞭下蟲蛆詎忍聞
看君才豈催科拙請謁公門非所屑
藩臣答詔誤承恩翻然遂就遷官列
匹馬悠悠復路歧即今失意欲何之
同鄉冢宰諳名姓府掾郎曹佇可期

歲杪放歌

終年著書一字無中歲學道仍狂夫
勸君濁醪且自沽何人不說宦遊樂
如君棄官復不惡何處不說有炎涼
如君杜門復不妨縱然踈拙非時調

便是悠悠亦所長

贈殿卿

前年賜環承主恩
去年解裾辭王門
身經畏途色不動
心知世事口不論
自顧平生為人淺
羨君逃名我不免
自憐垂老尚憑陵
羨君混俗我不能
有酒便呼桃葉妓
得錢即飯蓮花僧

金吾行贈戴將軍

先皇諸將何其雄
君家大人國士風
賜錢留起嫖姚第

詔宴數入蘭臺宮五雲忽變石城氣七校親隨萬乘東
當年帶礪山河在四海車書日月通侍從敢聞潛邸事
朝廷竟錄代來功此時十歲羽林孤躍馬能彎兩石弧
漢主臨軒求故劍承恩一拜執金吾生成燕頤寧辭武
得奉龍顏不羨儒三提鹵簿陪陵寢再護樓船下郢都
禁中自失張安世天上還看周亞夫

逼除過石史水村江山人同賦

夜來北渚北風急打頭雪花大如笠片紙東飛右史書

詰朝小作湖中集到門白鳥出高巢繫馬南山送人入
使君亭午未解醒肅客登筵一長揖地僻兼無俗子妨
樽空况有鄰家給意氣還須我輩看功名但任兒曹立
瞥眼旋驚青歲徂沾脣莫放金杯澀世上悠悠已自諳
即今不飲嗟何及醉聽楚調起寒雲綵筆憑陵朱絲濕
平生多少伯牙心比日因之寄篇什

賦得鴈池送許右史游梁分奈字

漢家藩國稱冠帶鴈池多暇為高會賓序同推枚叟尊

星潢共指梁王大賦成錦字映長流酒酣飛羽傳寒瀨
藻翰常生授簡中潺湲不散鳴箏外清影朝含竹苑霜
悲聲夜雜吹臺籟白首君恩豈稻粱朱門旅跡非蕭艾
極知慕侶倦游人秋來肺病誰能耐

道逢郭子坤擁妾戲東

城東桃花噴路光春風吹送孝廉郎自擁佳人馱細馬
時臨綠水照紅妝羅裙已奪石榴色禿袖單衫杏子黃
躡鐙微籠雙玉趾揚鞭笑起兩鴛鴦同棲孔雀言猶妬

並蒂芙蓉頤始償為謝使君休借問郭家少婦身姓王
二八盛年真擅寵只今三十尚專房持齋能苦頭佗行
發誓曾燒頂廟香浩劫自知仙女分他生常在世尊傍
每修好事辭書舍但有佳期入道場纔看霓裳顏更少
但盤雲髻壻先狂假令不信吹簫侶試向秦臺看鳳凰

和許長史箏伎篇

君不聞秦箏多慢聲平臺女兒新長成家本邯鄲行步
好生年十三指爪清安得此雙絃索手那能獨酌高陽

酒正值傾囊無俸錢將來換馬還肯否自從解贈同心
結不惜樽前香腕折幾回玉柱鴈池飛春愁散作梁園
雪合就羅敷陌上桑含顰一嘖發中堂遙知華髮玉門
客縱是風流也斷腸

答寄殿卿見夢之作

憶昔紅顏日携手一別三年非不久縱使天台記阮郎
也應梁苑稱枚叟故人多病臥青春華髮如蓬自看醜
漫爾風流更牢騷從他憔悴仍醉酒悠悠世上竟須疑

夢裡相逢知是否

和殿卿春日梁園即事

梁園高會花開起直至落花猶未已
春花着酒酒自美
丈人但飲醉即休纔到花前無白頭
紅顏相勸若為留
春風何處不花開何處花開不
看來看花何處好空回

答寄子威

劉生家本安東子不爾高名那如此
十載論交少聞問
君胡尺書數千里蒼頭大奴前置辭
主人束髮重知己

家本闔閭城下兒清風獨為延陵起便從出刺三河選
攬轡爭誇按百蠻早歲升公趨漢署只今謝客臥江關
雖言萬事歸來好乍可論交到誰老猶作鳳凰池上看
窮途殺更耽文藻中間跌蕩復王郎伏臘扁舟發太倉
但語即翁常在口彼時多士儼成行宦情漸覺緜袍勝
秋興翻隨綵筆強魏倩一珠纔照乘主人雙壁竟登塲
倡余和汝篇相及日居月諸業以集共道提戈虎穴迴
儻容投謁龍門入開城寒色散陽湖白雪樓空嶽影孤

不盡雄才推二妙止如古調已吾徒一當單于則豈敢
相遇中原尚足圖但語主人須自愛一時長句似君無
酬李東昌寫寄白雪樓圖

并序

樓在濟南郡東三十里許鮑城前望太麓西
北眺華不注諸山大河清河交絡其下左瞰
長白平陵之野海氣所際每一登臨鬱為勝
觀東昌李使君子朱以讀白雪樓集於廣川
馬中丞家咄然壯之歸為圖以寄而攀龍贈

馬如此

詩名東郡沈隱侯那復擅奇顧虎頭江湖盤薄有能事
畫我山中白雪樓揮毫已經海色至無乃兼驅蛟蜃遊
須臾百里岱陰合咫尺疑聞清河流華不注山得非雨
平陵以西胡獨秋松風似欲卷綃起良久看雲失去留
丹青快意癡如此丘壑過人老即休使君實解郢中調
為爾深知宋玉愁

送鄭生遊大梁

并序

鄭生者名文賢楚之雲夢人也少慕魏伯陽
之術往往談長生自雲夢來關中三千里持
一囊藥耳所至逆旅醫小兒即食其媪醫老
即食其子弟醫婦女即食其夫度三千里如
在里巷中矣然不為楮也其來關中庶幾望
見能為長生者焉余蓋苦多病三十年於此
言醫也即未嘗見醫視脉如生者豈其診書
異有它禁方邪生又自言醫且五十年於此

手指之拊人脉多於握也著咀咬如丘陵即
未嘗不精神與病者通長桑君豈實視見垣
一方人哉不察見脉而治病其礙豈啻垣一
方關中故多賢豪人即如大中丞何公博物
君子也亦言生矣余又言秦越人來長安遊
時事生未嘗不輒苦其術而隱之不得屬余
在告將歸生亦欲遊大梁則關中自大中丞
許公大司徒劉公以下皆賦詩贈之而余序

其右方云

君不見黃鵠高飛未可羅
榆枋之雀奈我何
拂衣春色為黯淡
故山高臥白雲多
風塵誰識大梁行
夷門輕薄笑侯生
虛左莫言公子事
今日邯鄲已罷兵
金丹初出照人寒
瑤草千年老鶻冠
更欲清秋觀渤海
那能渴病滯長安

代香山寺老僧答

老僧何處來
迎客身無袈裟
足無舄
雖有弟子今流離

獨向空山種麻麥先時長者布黃金大師說法如來席
浮圖中霄天樂下禪堂雨花坐盈尺共道當朝少遊幸
唯此祇園有恩澤綵丈晴連鸚鵡林宮娥晚傍蟾蜍石
侍從求者貝葉編焚香再拜開琳碧我往能言西域文
珠函為取華嚴譯自復懸燈香鑪峰君其問臘庭中栢
何曾馬繞招提鳴未見沙門畜四兵羯虜公然馳赤縣
湖外秋風笳吹聲猶疑窮谷豈遽至已聞野哭尸縱橫
裹創被血竄榛棘問之不答慘且驚須臾牛羊蔽陵壑

三騎五騎探長纓，
一騎常驅百漢人。
一人常聯二騎行，
翻身仰射累毳落。
東茅縱火燒朱甍，
豈無卓錫笞其背。
佛力不祐人心傾。
西堂北丘緣業惡，
寺前荒冢遂崢嶸。
亦是官軍入援急，
匈奴颺去歸其營。
匍匐漸從草莽出，
晝伏夜走同狐鼯。
衣鉢蕩盡微軀在，
性命真如飛鳥輕。
丈人豈願聞喪亂，
神州豈宜有戰爭。
故人更邀住廬嶽，
萬乘垂衣右北平。
燕中耆舊寄書說，
早晚單于和議成。
語罷空林轉蕭瑟。

茫茫天地終何情

滄溟集卷五

欽定四庫全書薈要卷一萬七千一百二十九

集部

滄溟集卷六

明 李攀龍 撰

五言律詩

酬皇甫虞部寒夜書懷見寄

兄弟播清徽詞林振羽飛
再來郎署重何謂宦情違
夜雪留沽酒寒燈坐掩扉
共嗟羈物役歲晏此依依

圓硯效徐庾體

片石分雲出良工
向月刪自疑臨壁水
誰為縮壺山洗

墨沈金鏡呵冰斷玉環
畫簪京兆婦纖指曲池間

秋扇

自從團扇棄空復掩梁塵
寒影收雲葉清光暗月輪
誰憐班氏女薄命漢宮人
但使緘蘭笥君情會更新

同皇甫繕部寒夜城南詠月

片月掛遙岑層城曳素陰
寒分宮樹淨影落御溝深
結冷悲征笛勻霜上擣砧
西園芳宴後白雪復誰吟

元夜

公子聯鑣語佳人把袂歡星橋雲外出火樹雪中看夜
色開清禁春醑許從官仍聞祠太乙達曙禮仙壇

登省中樓望西山晴雪

忽見西山雪高樓重倚欄數峰城上出落日署中寒佳
色繁天仗清光切露盤小臣操郢曲願獻聖人看

憶弟

新醪楊柳色不醉欲何如薊北三春雁山東二弟書宦
情閒遂淺人事病全疎未擬酬恩去空令憶舊廬

初夏趙氏園亭

獨值春風後幽期此重過
開樽黃鳥至高枕綠陰多
簪紱殊閒事乾坤一放歌
淹留君莫厭吾道本巖阿

送孟得之

十載薊門客秋風見長年
思家明月夜驅馬白雲天
來雁授衣後黃花落帽前
何人過攜酒共醉黎陽川

登省中樓

蕭瑟賦悲哉西山爽氣開
白雲海色斷落日秋陰來
砧

高長樂苑雁下華陽臺如何此時望客思轉難裁

酬徐負外舟中新詠見示

何處逢搖落秋風又別家天清鴻雁影江滿荻蘆花
明月留仙佩寒星犯客槎到來開篋笥新句動京華

送諸光祿還於越

幾年東省月坐憶故園遊忽有緘書至蘭亭禊事修
芙蓉天鏡曉風雨石帆秋到夜應逢雪門多乘興舟

長陵

明裡趨歲序陟降儼昭回
容物中原在乾坤北極開
松楸千騎入風雨百靈來
共話犁庭役遺弓重可哀

朝陵夜作

上陵無不美秋杪更宜看
風雨朝佳氣旌旗擁漢官
星流千嶂迴月出萬松寒
倚馬清鐘外新霜滿玉鞍

白雪樓

諸郎難得意非是敢沈冥
拙宦無同病清時有獨醒
千家寒雨白雙闕曉烟青
又值高樓雁寥寥不可聽

送楊子正還濟南

我家白雲渚落日掩孤城讀書草堂上濯纓湖水清古
來失意事不獨名未成北風敝裘雪誰見棄繻情

重送楊生

十年湖上別風雪此相親把酒論時事霑衣向故人浮
名青歲換生計白雲貧但去卧芳草山中鴻雁春

殿卿至

駿馬何當出金高郭隗臺雪中春酒熟書後故人來白

首文章事青雲王伯才誰為一知己念子正悠哉

送殿卿

嗟君復失意吾道轉堪疑
白雪論先達青雲合後時
落花寒食過載酒故山期
莫以楊朱淚春風灑路岐

章行人使潞藩

使者持符下風塵叱馭前
諸侯城赤狄列嶂黨青天
年時芙蓉避暑筵相逢多
愛客共賦遠遊篇

十六夜集劉子成宅

羽書三十度飛騎動長安
今夜樽前月還同燧火看入
門清影滿久坐素華寒
何處關山引如悲行路難

聞砧

永夜盧家婦深閨坐自傷
拭砧散明月投杵上清霜
別恨繁鴛綺哀音急雁行
同袍征戰盡刀尺斷人腸

送張比部募兵秦晉諸郡

天威嚴滅虜使者出秋官
白羽徵兵入黃金結士懼風
雲千騎動雨雪二陵寒
無易行間客能登漢將壇

送沈郎中守順慶

見說褰帷處，千山擁使君。
嘉陵渡春水，棧道轉秋雲。
郡下平蠻檄，家傳諭蜀文。
病餘饒卧理，能不憶離羣。

春日韋氏園亭同元美賦 二首

春塢花冥冥，斜陽倒玉筍。
風塵猶傲吏，天地此空亭。
共醉薊雲白，相看燕草青。
我來吟澤畔，不是獨為醒。

其二

藉草到流水，看花延落暉。
客中過寒食，馬上改春衣。
移

席青山出開樽白鳥飛天涯有朋好能使宦情微

夏日同元美徐子旋賈守準劉子成集張氏園
亭得談字

共載杯中物聊停塵外驂
路人終白眼世事豈清談
高枕夏雲出空亭斜照含竹間
有流水可以漱餘酣

初夏同元美汪伯陽皇甫子循集姚明府園亭
得春字

五柳陶潛宅猶藏杜曲春
綠陰衣上滿黃鳥席邊新
河

朔當年事風流我輩人胡為日車馬擾擾向紅塵

送蔡少府之陽武

君歸寒食後猶及縣中花趨府具茨野鳴鞭博浪沙大河秋色外使者白雲槎豈不勞行役風塵見歲華

為殿卿悼亡

歌梁塵未斷舞袖影方閒落月窺珠鏡青春暗玉顏為雲歸峽裏竊藥去人間安得招魂術姍姍步幄還

答殿卿

故園春草後書札問同袍
海嶽遊當壯風塵卧正高
大名詩裏出浮世酒中逃
顧我仍多病時危小吏勞

送獲嘉郭明府

仙舟新出宰秋色渡淇河
官屬諸侯貴君才百里多
政齊吳季重地接衛朝歌
漢主憂南服長纓送尉佗

雲溪徐山人二首

風塵餘髣髴天地此栖遲
不問家人產寧求國士知
門無荷蕢過鄰有灌園期
得道憑烏几藏名號鹿皮

其二

自有浮雲戀非因倦鳥還林光清客夢湖色駐人顏歲
序高懸榻風塵老抱關不投明月壁甘隱大雷山

毛刺史姑蔑高齋

武陵看花處二仲得相聞雨白閩天合山青越徼分書
聲散秋瀑翰墨染春雲府檄何年事猶餘猿鶴羣

出郭

出郭隨吾適人家杜曲邊溪流縈去馬山路入鳴蟬禾

黍殷秋作茅茨足晝眠可能祛物役歸買汶陽田

張氏園亭

辟疆開別業載酒雨中看亭敞千花暝樓空萬竹寒呼
童攜枕簟勸客解衣冠宿我山牕下聽詩坐夜闌

碧雲寺禪房

佛土秋逾淨花臺夜復香一燈醒夢幻孤磬散清涼月
上梵輪滿湖開天鏡光新詩分妙偈病客對空王

早春元美公實訪茂秦華嚴精舍同賦

招提多病客擁褐世間情法自傳燈得詩先卓錫成年
光雲樹麗春晝雨花明若許東林住還攜漉酒生

十四夜同王徐宗梁四君子集靈濟宮

二首

愛此壺中約人皆曼倩才華燈懸日月仙樹接蓬萊青
鳥銜書去金貂換酒回明宵祠太乙方士漢宮來

其二

逍遙玄圃望清切紫微層月出三山樹春回萬井燈無
悲田變海但願酒為澗門外金羈影王孫自五陵

張山人

吾鄉張仲蔚未是蓬蒿人
伏臘東籬下漁樵北海濱
官家還賦役客路且風塵
織妾齊紈素開筵嬌上春

春日

為客淹歸騎思家過斷鴻
春衣花發後寒食雨聲中
生事羞人問時名與衆同
自甘郎署隱不哭宦途窮

東公實

如何梅發後更憶故園春
海上多歸夢天涯一病人
世

情元慘淡宦迹好逡巡莫作鴻冥客青雲未可親

同元美與諸比部早夏城南放舟

六首

豈悟風塵客還能汗漫遊天涯唯短髮海內此扁舟宦迹清時劣人才畫省優百年渾綠醕一日且滄洲

其二

最憐行役久為樂未言疲自起投車轄長歌覆羽卮江湖青雀舫僚友白雲司醒後驚相問佯狂信有之

其三

誰為河朔飲吾願罄交驪杯動滄波色舟空白日寒題
詩溪鳥過岸憤野人看不是江湖興風塵此道難

其四

落日維舟好君其問水濱舉觴遙送鳥倚樹醉看人各
負詩無敵翻驚會有神明朝在城郭騎馬共風塵

其五

春歸興不孤勝地此相呼公等稱詞伯余將混酒徒山
光含浩蕩秋意颯江湖樂事關窮達浮生敢自誣

其六

言尋韋杜曲與客放船行
樹影含衣動溪光逼酒清
狂來出真態醉裏見浮生
所以山公後寥寥達者名

寄茂秦

向來燕市飲此意獨飛揚
把袂看人過論詩到爾長
世情搖白首吾道指滄浪
去住俱貧病風塵動渺茫

再遊南溪同應駕部徐比部賦

四首

此日南溪約應徐賦客
同據牀千竹下進艇
百花中天

入華陽館雲生碣石宮昔賢何慘淡吾醉任鴻濛

其二

覆席花如待窺簾鳥似知到來拚共醉坐久見吾詩吏
迹江湖傲仙才日月欺幸逢休澣出不顧尚書期

其三

宴遊無俗吏休沐有殊恩碧草堪同藉紅塵可重論溪
聲留倚杖山色取當樽夙昔疑吾醉維舟尚在門

其四

花鳥從春過嬉遊到夏偏白雲行酒上清吹起舟前世
路身何得吾徒賦必傳寧須千日醉不擬衆人憐

郊行二首

稍似武陵溪人家綠樹迷桔槔茅屋上荷蓀薊門西清
吹生衣袂繁陰散馬蹄紅塵纔只尺城郭意多睽

其二

並馬未央前看雲過灞川時逢黃鳥住欲就綠陰眠宦
豈登臨拙名非案牘傳風塵朋好在回首汶陽田

東元美二首

偃蹇寧知病，今如藥裹何。
清齋山雨至，高枕夏雲多。
詞賦芳顏妬，風塵壯志過。
相憐誰最久，把臂此蹉跎。

其二

久矣疲朝謁，深惟傲吏情。
臨風看玉樹，消渴望金莖。
返照虹霓出，浮雲駟馬行。
慚無枚叔賦，起爾薊門城。

夜過元美二首

眼底誰同病，天涯好自親。
放歌依白日，縱飲向風塵。
世

態搖知己時名走衆人朝叅君莫嬾漢主憶詞臣

其二

病即科頭出狂仍枕腹眠禮非因我設汙不受人憐興
盡銜杯外言深把燭前開門看墮月騎馬問朝天

夏日同元美子與子相天寧寺送別公實

二首

宴坐人天近清齋僧夏深出門成遠道駐馬向祇林益
愧風塵色相看湖海心惠休能怨別為擬碧雲吟

其二

西域黃金地南訛大火天贈言迴白雪寒色動青蓮幻
迹抽簪外浮名把袂前古今皆涕淚去住各風烟

夏日同元美子與集子相宅

佳客堪常見幽期暑亦過披襟度風雨把酒出星河嬾
拙元相藉文章敢自多夜深忘白羽玉樹倚蹉跎

東子相 二首

已負西山約將無惜壯遊懷人當落日卧病復清秋時
事君高枕風塵我敝裘加餐看物理天地一虛舟

其二

楚客秋多病，羈心私自憐。
各天散朋好，八月見烽烟。
白露寒砧下，青楓過雁前。
豈應裁恨賦，寫任故人傳。

別汪正叔員外

幾年金虎署，與爾結交歡。
傲吏莊生似，詩家鮑叔看。
春光燕樹合，雨色薊門寒。
各杖臨歧淚，風塵去住難。

懷魏順甫

白雲同署客，相念意悠哉。
交道蕭朱失，文章屈宋來。
風

塵還傲吏案牘豈時才不見黃金駿秋高薊北臺

登黃榆馬陵諸山是太行絕頂處

四首

黃榆高不極臨眺亦奇哉河勢中原坼山形上黨來
白雲橫塞斷寒峽倚天開搖落清秋色多慙作賦才

其二

不盡寒雲外青峰落照多秋陰生大鹵木葉下滹沱
巨壑藏風雨飛梁掛薜蘿重關三輔地躍馬意如何

其三

振衣巖木下倚杖白雲層落日懸狐塞清秋度馬陵千
峰寒自出大澤莽相仍左瞰邢襄郡分符憶股肱

其四

秋色自冥冥風烟接井陘關門開落日山路出寒星太
守方乘障清時敢勒銘杉松迴朔氣衰壑未堪聽

答明卿病後見寄

二首

薊門搖落後楚客病如何秋色高金掌西風滿玉珂開
樽鴻雁至染翰五雲過應憶山陽會疎狂阮籍多

其二

吳生何偃蹇稱病不朝天
侍從官非拙浮沈世所憐
黃金燕士裏白雪郢人前
自識銜杯趣逾看結襪賢

寄元美 二首

宿昔神仙省青雲向爾親
償金聊玩世抱玉故調人氣
色高題柱文章老斲輪別來多所憶
卧病上林春

其二

豈不為同舍于時媿重名
佳人誰獨立大將爾橫行病

起高詩興春光美宦情懸知思遠道落日薊門城

即事 四首

浮雲如浪迹春色且邢州磬折人堪老蕭條客自愁孤
城山下出大陸日西流請郡終何意風塵復倦遊

其二

天涯看薄宦何以異飄蓬才豈分符後名非薦疏中黃
塵靈落日白羽插春風聞道漁陽戰方論衛霍功

其三

嬾慢終疑傲和光意遠哉元龍無客禮方朔有仙才疾
苦塞帷過風塵領郡來那須論往事作賦栢梁臺

其四

使者殊旁午吾生自不辰文章看長物道路竟何人寒
食孤城外檐帷大澤濱那堪楊柳色風雨傍行春

寄宗考功 二首

別離如昨日豈厭廣陵濤春色漁陽滿烽烟海上高文
章迴白雪顧盼解綈袍下走猶三輔蕭條欲二毛

其二

春色還堪起青雲固可披振纓人不病把袂客能詩奏
事明光殿掄才藻鏡司嵇康猶自嬾早辱巨源知

寄殿卿二首

人情原慘淡世路故蹉跎意氣彈冠少風塵按劍多客
居深雨雪春夢遠漳河賴有西山色猶堪載酒過

其二

燕山為客地莫共酒人居吾輩詩名大其徒劍術疎風

塵官不調雨雪歲將除何限東歸意春花滿舊廬

春興 二首

短髮黃塵裏浮生白日徂詩名堪自見經術敢相誣薦
列終才吏逢迎豈壯圖有年輕召杜不病足江湖

其二

案牘將能事文章敢具陳跳梁看此物隱几過時人返
照生殘雨浮雲矯上春夙心唯病免不欲滯風塵

重送許永寧 二首

絕域天應斷揚波海未平浮雲隨薄宦華髮繫微名傳
檄西南定褰帷瘴癘清看君饒卧理經術晚逾成

其二

世情今可見此摘竟堪陳偃蹇難容汝文章不利人清
秋炎海外落日大荒濱莫更埋銅柱功名老漢臣

郡齋送張肖甫

二首

薊門相憶處豈不問加餐卧理非吾意詩名向爾看白
雲尊酒盡山色郡齋寒莫惜重投轄秋風道路難

其二

送君何所有城上太行山
落日堪相憶浮名未可攀
俱言張翰去得御李膺還
莫自悲秋色能摧壯士顏

閣夜示茂秦

四首

相逢殊不惡久別竟誰驩
貧病他鄉老交遊古道難
開樽山欲出說劍雪逾寒
如此蕭條色高齋爾自看

其二

為客今猶在浮名信已勞
病來衰綠筆老至戀緜袍
閣

卧風塵過銜杯夜色高
舊知江夏守不厭禰生豪

其三

病起看時事歸心不可裁
著書官欲罷問字客還來
月出樽堪滿霜清角自哀
相憐成白首明日阻三臺

其四

把袂今何夕高齋雨雪清
詩才君矍鑠酒興我從橫
同病無交態相依豈世情
春來徵渤海陳對引王生

寄元美四首

我昔朝宗日君亭使者軒並驅皆上駟相遇復中原草
昧時人起風塵國士恩別來春色滿無處不銷魂

其二

若問除書意君何異積薪姓名常借客踪跡竟疑人為
郡空高第當朝各要津拂衣吾所欲不是避風塵

其三

漁陽春欲盡漢使未堪愁邊郡多豪俠風塵一壯遊浮
雲寒大漠白日澹幽州莫更觀遼海蕭條正北流

其四

何悟淹為郡風塵日以難宦情踈自解人事拙相看高
枕西山色清齋大麓寒期君秋月滿從此掛吾冠

夏日行部遇明卿子與於瘿陶邑

何來漳水上早晚發長安放逐吾曹在風塵此道難孤
城高自卧萬事醉相看莫擊鄒陽劍霜飛五月寒

郡齋與元美賦

握手今何在高齋共此樽衆人方睥睨二子向乾坤經

術從吾淺詩名得爾尊當時楊馬輩誰復在金門

送元美 二首

吾曹天地在不惜滯風塵意氣能無合文章自有真齊
名他日事側目此時人為別還秋色樽前白髮新

其二

把酒論離索塞帷送友生白雲高大麓秋色重孤城偃
蹇還詩句蕭條自世情贈君無趙璧落日片心明

黃河

復就三秦役還為四牡歌北風揚片席大雪渡黃河才
豈諸郎少名非一郡多儒官明主意吾道好蹉跎

關門雪望

西來千里雪斜日滿函關秋水何當落浮雲自不還積
陰高紫氣寒色壯秦山似欲欺雙鬢蒼茫到客顏

發長安

此處看春色蕭條客自禁風塵為郡過踪跡抱關深不
盡傳經意難言作賦心故人多道路薄宦有登臨

涇州

迴磴層雲上孤城返照間人烟趨白阪
睥睨走青山
芻粟浮涇下旌旗度隴還時看乘障吏車馬
出蕭關

秋日四首

薄遊寒暑換仍自滯孤城華髮看人事
浮雲識宦情
拂衣驅病色懸榻避時名但欲眠清晝
相嘲任友生

其二

此物還堪惜何官不可休驅馳如昨日
藥餌更清秋
名

已千人廢家徒四壁愁南山歸自好沮溺本同流

其三

倦遊非一日乘興復三秦多病難為客浮名喜中人未
堪沈案牘何以走風塵祖帳東門外賢哉一老臣

其四

還鄉明日事可奈簿書勞棄置看同病風塵避二毛酒
如涇水濁枕對華山高不是清秋色何人見反騷

五日和許傅湖亭讌集

二首

城頭片雨懸客醉
惜湖邊酒奈榴花妬
人堪桂樹憐五
絲還令節雙鬢抵
流年莫蹋王孫草
淮南賦已傳

其二

青樽臨北渚一為故人開
此事成今昔浮雲自往來
花間攜枕簟鏡裏出樓臺
忽就投湘賦深知賈誼才

寄元美

寥落文章事相逢白首新
微吾竟長夜念爾和陽春
把酒千門雪論交四海人
即今燕市裏擊筑好誰親

贈子與

握手論交者春來限各天
即今行樂處不似舊遊年
神物風塵裏時名我輩前
豈令徐孺榻白日此長懸

汪負外移水部時城京師

聞有金城役掄茲水部才
中原憂被髮使者詠于懸
睨燕山接風雲瀚海來懸
知胡騎遁天子宴蓬萊

即事四首

羽書秋色外飛輓海陵迴
日上犁庭議時難度漢才物

情竒士過天造異人來側席勞明主黃金正滿臺

其二

即今難授鉞誰可靜胡塵談笑存能事艱虞失衆人大
軍歸掌握王者自經綸不復憂驕悍如林護北辰

其三

使者晨馳壁奪歸平虜章自天懸斧鉞擇日設壇場萬
馬中原集諸軍上苑旁主恩無可報一戰取名王

其四

金方口人
卷六
天子何神武乘秋欲破胡
儒臣擐甲胄大將解兵符
叱咤風雲合艱危日月扶
北瞻陵寢色蔥鬱近皇都

賦得屏風

虛屏漢宮裏有女白頭吟
色倚琉璃怯秋來湘水深
歡情張畫燭愁坐掩清砧
莫為蒼蠅誤君王在上林

渡滹沱

滹沱來不極曉色蕩孤城
擊楫中流過寨帷下吏情
天街紆岸轉日上大波行
獨在知津後風塵見濯纓

廣陽山道中

出峽還何地杉松鬱不開雷聲千嶂落雨色萬峰來地
勝紆王事年饑損吏才難將憂旱意涕泣向蒿萊

趙州道中

獨往何為者栖栖意不歡寒帷秋雨過伏軾夏雲殘潦
水陰相積蒹葭晚自寒大夫方跋涉天步屬艱難

吳舍人喪內 二首

楚妃色殊衆不獨下堂悲鼓瑟瀟湘夜秋雲未可持河

流雙露掌月出萬年枝屬有將雛曲能無泣鳳池

其二

可憐御溝水見此白頭吟
病客思江郡詞臣在上林
春風動花樹秋月散清砧
唯有陵陽淚知君抱玉心

和殿卿白雪亭醉歌

狂殺王門客空亭日嘯歌
那知珠履散自愛白雲多
短髮明秋水長裾曳芰荷
獨憐枚叟在不復厭婆娑

元美以家難羈京作此為言 四首

馳騁淄澠日功名與宦情
高堂一為坐世路遂相輕
行乞還燕市悲歌復薊城
佩刀風雨夜堪作箭中鳴

其二

一自抽簪後漂零見此身
通章尋悟主懷刺更依人
寒入綈袍色愁生黍谷春
不因家難劇君豈在風塵

其三

海內論兄弟蕭條二子才
一時稱病罷萬里拂衣來
雨雪人高卧蓬蒿客自回
偶然占劔氣夜夜向燕臺

其四

聞道周旋地偏承老父顏
索饋時在側賓客稍居間
函谷更封出夷門執轡還
莫將公子淚亂漫灑燕山



滄溟集卷六



總校官庶吉士臣侍朝

校對官檢討臣王鍾健

謄錄監生臣沈心醇

謄錄貢生臣蘇曰柄